



FM 2015/137

Randi Vestergaard Evaldsen

30. april 2015

Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqtatigiit)

(Siullermeenera)

Atassutip Siumutp Demokraatillu naalakkersuisoqatigiinnissamut isumaqatigiissutaat ersarilluarpoq aatsitassarsiornerup iluani siunnersuisoqarnissamut tunngatillugu. Issuaalanga:

"Nunani tamalaaneersunit inuttaqartumik aatsitassarsiorneq pillugu siunnersuisoqatigiinnik Naalakkersuisoqatigiit pilersitsinissaq suliarissallugu isumaqatigiissutigaaat."

Inuit Ataqtatigiit uuminnga siunnersuuteqarnermikkut qulagiillutik isummersorniarsaraat naalakkersuisoqatigiinnissamut isumaqatigiissummi oqaaseqatigiit qanoq isumaqassanersut. IA isumaqarpoq "immikkut ilisimasallit nunanit allaneersut" tassaasut politikkimut attuumassuteqanngitsut siunnersuisoqatigiit, aningaasaliisartut tutsuviginassusaat taavalu aatsitassarsiornerup iluani aningaasaliinissamut pilersaarusiorderit pillugit innersuussissutinik sanasartussat kiisalu suleqataasussanik aatsitassarsiorfiit tigussaasut piffissaq ungasinnerusoq isigalugu aamma nungukkiartuutaanngitsumik inuiaqatigiinnut ineriartortitsarnissaanik nassataqartarnissaannut.



Ingerlaannarlunga naqissusissavara Demokraatini IA-p taamatut isummersuinera isumaqatiginnginnatsigu.

IA- p kissaatigaa siunnersuisartuliortoqassasoq, qinnuteqaatinik suliniutinilu ataasiakkaanik sukumiisumik misissuisartussanik, qinnuteqaatillu ataasiakkaat suliniutillu ataasiakkaat pillugit innersuisartussanik. Tamatumunnga kissaammut Demokraatini isumaqataanngilagut.

Isumaqarpugut siunnersuisartoqatigiit taamaattut allaffissornermut annertusaataanginnassasoq, kiisalu ujaaseqqaarnissanut piaanissanullu akuersissutinik tunniussisarnissamut sivitsorsaariinnartussaq kinguarsaaginnartussarlu. Imaarataannaavoq taamaattoqalerpat aningaasaleerusussuseqarsinnaasut nunatsinniik qimaatinneqaannartut tamannalu kissaatiginngilarput. Aamma IA taamaattariaqanngilaq.

Demokraatini paarlattuanik kissaatigaarput arlaannaannulluunniit attuumassuteqanngitsunik immikkut ilisimasalinnik suleqatigiisitsinissaq pingaarnernik suliaqartartussamik pilersaarusiortartussamillu. Suleqatigiisitat suliarissavaat siunnersuinissaq innersuussuteqartarnissarlu qanoq aatsitassarsiortut misissueqqaarnissaminnut nunatsinnullu aningaasaliinissaminnut soqutiginninnerulersinnaaneratt pillugu.

Demokraatit isumaat naapertorlugu siunnersuisartoqatigiit pineqartut taakku marluk assigiinngissutaat ersarilluinnarpoq. Kissaatigaarput immikkut ilisimasallit innersuussuteqartarnissaat qanoq iliorluni aatsitassarsiorderup iluani ingerlatseqatigiiffiit aningaasaliisartullu pilersaarsinnaanerannut. IA-p kissaatigaa siunnersuisartut siunnersuisassasut innersuussuteqarlutillu suliniutit qinnuteqaatillu suliarineqalereersut pillugit.

Tamanna tunngavigalugu siunnersuut itigartinneqassasoq siunnersuutigaarput.